

Segun comunicado di MEP Drs. Shailiny Tromp-Lee

Eventonan cultural di indole asina merece miho atencion di gobierno y pueblo

ORANJESTAD-- Diasabra 24 di augustus 2013 a tuma luga Eleccion di Mosa Cultural den Centro di Bario Brazil y tabata un gran honor pa mi por a presencia e eleccion aki cu pa di dos biaha esaki ta tumando luga na unda nan a cera conoci cu e di 4 Mosa Cultural.

Na prome luga mi kier felicita sra. Ludwina Geerman, Mosa Cultural 2013, Sra. Rosie Alberts Mosa Folklorico 2013 y tambe tur e otro mosanan cu a participa na e eleccion aki. Sigur un gradicimento ta na su luga pa e mosa saliente sra. Lejuez, cu a sa di haci un tremendo trabou durante 2012-2013.

Mi ta di opinion cu tur e participantenan a haci un gran esfuerzo pa por a haci e eleccion aki un realidad. Naturalmente mi mester felicita tambe e grupo grandi di hende cu ta participa den e team di presentacion di cada mosa. Loke mi a admira mas tanto ta, cu cada team tabata consisti di mucha, hoben y adulto. E combinacion aki di chikito te grandi ta un base fuerte di conscientisacion cu e Eleccion di Mosa di Cultura ta fomenta y stimula.

Na di tres luga mi kier felicita e Comision Organizado encabesa pa sr. Mariano Bermudez. Cu masha tiki fondo e comision a demostra un biaha mas di por pone un evento bon hinca den otro y bon presenta. Un felicitacion special ta bay na Danny Koolman kende a traha un himno special pa Eleccion di Mosa Cultural dedica na nos Mama di Cultura sra. Bernadina Growell, cu e composicion di Sr Freddy Montoya di Departamento di Cultura Aruba, kende ademas tabata tin na encargo di un excelente apertura y a fungi como director artistico di e actividad den su totalidad.



E aña aki e comision a dedica e eleccion na Aña di Papiamentu. Uzo di e tema Papiamentu ta duna un toke special na e eleccion. E ta duna oportunidad tanto na e candidatanan como na e publico presente pa cera conoci mas a fondo cu un aspecto specifico di cultura. Basa riba e creatividad di cada mosa y tur e miembronan di nan team, e candidatanan tin cu demostra pakico nan ta kere cu nan mester haya e voto maximo di e miembronan di hurado.

Personalmente mi mester bisa cu mi tabata tin e honor di a forma parti di e team di hurado di e prome Eleccion di Mosa di Cultura na 2012. Mi ta corda cu na e ocasion ey, e team di hurado a duna diferente sugerencia na sr. Mariano Bermudez. Awe mi ta sumamente contento di mira con e comision organizado a tuma diferente di nos sugerencianan na serio y nan a purba di incorpora esakinan den e programa di preparacion y den e eleccion. Naturalmente semper ta keda cosnan pa cambia ora un actividad ta asina recien. Ta tuma su tempo prome cu por haya un concepto cu ta na satisfaccion di mayoria hende.

Pa por yega na un perfeccion di e actividad aki lo tin mester di mucho mas ayudo di tanto di nos gobierno, como di nos sector priva, pero tambe di nos specialistanan cultural. Entre otro, e aña aki, e mosa actual a prepara su presentacion y participacion bou di guia di Michael Douglas, kende a diseña su traha y a yuda cu su presentacion cultural.

Cada mosa ta haya algun minuut pa duna un presentacion cultural, pa medio di cua nan mester mustra e publico e importancia di e tema Papiamentu. Nan por haci esaki pa medio di musica, baile, sketch, canto etc. E mosa ac-

tual a duna un presentacion di un sketch completamente papiamentu, uzando nos dictionan na Papiamentu y merecidamente el a bay cu e titulo di Mosa Cultural 2013.

Mosa Folklorico tambe a presenta un show di kita sombre. Mi no por keda sin menciona e presentacion di mosa Jarmaine Acosta cu a duna un bunita presentacion basa riba nos canticanan amoroso den nos idioma Papiamentu, cu en realidad tambe ta poemanan cu ta uza pa traha un cancion.

Mi kier felicita Departamento di Cultura y e compania Johnson & Johnson's cu a duna un sosten significativo na e eleccion aki y tur otro cu di un manera of otro a contribui. Mi kier termina na bisa, como candidato nr ocho (8) riba lista di MEP, cu tanto Centro di Bario Brazil como e comision organizado por conta cu mi apoyo total na momento cu MEP drenta den gobierno atrobe.

Eleccion di Mosa di Cultura ta un actividad cultural cu

mester sigui den futuro y cu apoyo total di Gobierno di Aruba crece bira un atraccion. Locual e mosanan ta presenta y trece dilanti, ta un contribucion importante y valioso den desaroyo y aprecio di nos mesun cultura y di e diferente aspectonan di nos cultura. Den mi opinion, den futuro mester hasta haci posibel pa e mosa ganado y tambe e miho presentacion di demas participantenan bay duna presentacion na diferente scol na Aruba. □

